


Giaman Rot Bilong Dvelopmen



WONEM KAIN SENIS I MAS KAMAP

Tingting na pasin bilong mekim wok bisnis na tu long ronim wok politik insait long PNG em ol lain bilong narapla kantri iwok long bosim insait long kantri bilong yumi na ino stap long han bilong gavman.

Dispela tingting oli kolim 'Capitalism' emi as tru bilong planti ol hevi we yumi iwok long bungim long dispela taim insait long kantri long wanwan dei.

Tasol wonem senis yumi laik lukim? Bai yumi mas kirapim tingting na painim wanpela gutpela rot bilong stretim sindaun bilong ol manmeri insait long kantri bilong yumi. Dispela rot bilong wok developmen imas luksave na bihainim ol pasin na sindaun bilong yumi long ples. Long dispela rot tasol bai yumi iken kamapim, 'Gutpela Sindaun Bilong Yumi Olgeta'.

Long kamap long dispela mak bilong Gutpela Sindaun Bilong Olgeta, ACT NOW! i luksave pinis long wanem senis i mas kamap. Mipela igat faivpela ol het tingting we iken halivim long kirapim gutpela sindaun bilong yumi olgeta.

1. Sampela pawa bilong Gavman long mekim disisen imas igo bek long ol Provins

Pasin bilong wok hait na stilim moni i wok long kamap bikpela tru na planti ol disisen gavman i mekim long ronim kantri na yusim moni bilong kantri ino bihainim laik na tingting bilong ol pipol. Planti long ol dispela disisen i no stap ples klia long wanem ol bung toktok i kamap long Waigani na i longwe tumas long ol pipol.

Sapos pawa bilong gavman long mekim disisen long ronim kantri na yusim moni bilong kantri igo long provins, klostu long ol pipol bai ol pipol iken putim was long wok bilong gavman na gavman tu iken kisim was.

2. Gavman imas skelim gut moni kantri kisim long ol risos bilong pipol

Long nau yet, planti ol stil pasin i wok long kamap na moni kantri kisim long ol risos bilong ol pipol we ol kampani bilong narapela kantri i go pas long en, i go long han bilong ol liklik lain tasol insait long kantri.

Gavman i mas tingting nau long:

- Kamapim wanpla 'Independent Commission Against Corruption' na givim dispela Commission pawa long traim daunim ol kain stil pasin.
- Noken givim moa tok orait long ol niupela bikpela risos projek insait long kantri. Gavman imas kamapim wok painim aut igo insait long olgeta kain wok bilong kampani husait i wokim ol bikpela risos projek na traim long kamapim gutpela sindaun bilong olgeta manmeri.

3. Lukautim Tumbuna Giraun

Planti ol komuniti na hauslain i kisim bagarap na sindaun i bagarap long wanem ol bikpela kampani bilong narapela kantri wantaim halivim bilong ol sampla ol save man bilong PNG yet i wok long giamanim ol pipol na stilim tumbuna giraun bilong ol. Gavman i mas banisim tumbuna giraun na tok nogat long salim o registerim tumbuna giraun na tu ol giraun bilong gavman.

4. Strongim wok bisnis bilong ol pipol bilong yumi yet

Ol gavman bilong bipo ikam inap nau ino bin givim gutpela luksave na banisim ol bisnis na indastri bilong ol pipol bilong yumi yet. Inogat halivim long sait bilong moni bilong kamapim bisnis na tu long givim skul long wok bisnis.. Gavman i mas luksave olsem wok bisnis na gutpela sindaun bilong kantri long bihain taim i stap long han bilong ol pipol bilong Papua Niugini yet. Gavman imas strongim dispela kain wok bilong ol pipol na luksave long ol.

5. Gutpela Skul na Helt sevis

Gavman imas givim gutpela fri skul na helt sevis igo long ol pipol bilong yumi. Long nau yet inogat ol gutpela sevis. Ol hausik, helt wokman meri na tu ol sikman ikisim bikpela bagarap. Dispela ino gutpela samting.

Sapos yu laik save moa, yu ken sekim website bilong ACT NOW!:

www.actnowpng.org